

四庫全書

集部

欽定四庫全書

白氏長慶集卷九

唐 白居易 撰

感傷一

古調詩五言
凡五十五首

西明寺牡丹花時憶元九

前年題名處今日看花來一作芸香吏三見牡丹開豈
獨花堪惜方知老閨催何況尋花伴東都去未迴詎知
紅芳側春盡思悠哉

傷楊弘貞

顏子昔短命仲尼惜其賢楊生亦好學不幸復徒然

一作

今復然

誰識天地意獨與龜鶴

一作蛇

年

權攝昭應早秋書事寄元拾遺兼呈李司錄

夏閏秋候早七月風騷騷渭川煙景晚驪山宮殿高
丹殿子司諫赤縣我徒勞相去半日程不得同遊遨到官
來十日覽鏡生二毛可憐趨走吏塵土滿青袍郵傳擁
兩驛簿書堆六曹為問綱紀掾何必使鉛刀

新栽竹

佐邑意不適閉門秋草生何以娛野性種竹百餘莖見
此溪上色憶得山中情有時公事暇盡日遶欄行勿言
根未固勿言陰未成已覺庭宇內稍稍有餘清最愛近
牕卧秋風枝有聲

秋霖中過尹縱之仙遊山居

慘慘八月暮連連三日霖邑居尚愁寂況乃在山林林
下有志士苦學惜光陰歲晚千萬慮併入方寸心巖鳥

共旅宿草蟲伴愁吟秋天牀席冷雨夜燈火深憐君寂寞意攜酒一相尋

寄江南兄弟

分散骨肉戀趨馳名利牽一奔塵埃馬一汎風波船忽憶分手時憫然秋風前別來朝復夕積日成七年花落城中池春深江上天登樓東南望鳥滅煙蒼然相去復幾許道里近三千平地猶難見況乃隔山川

曲江早秋

三年作

秋波紅蓼水夕照青蕪岼獨信馬蹄行曲江池四畔早
涼晴後至殘暑暝來散方喜炎燠清復嗟時節換我年
三十六冉冉昏復旦人壽七十稀七十新過半且當對
酒笑勿起臨風歎

寄題盤屋廳前雙松

兩松自仙遊
山移植縣廳

憶昨為吏日折腰多苦辛歸家不自適無計慰心神手
栽兩樹松聊以當嘉賓春來日一往生意漸欣欣清韻
度秋在綠茸隨日新始憐澗底色不憶城中春有時晝

掩關雙影對一身盡日不寂寞意中如三人忽奉宣室
詔徵為文苑臣閒來一惆悵長似別交親早知煙翠前
攀翫不遂巡悔從白雲裏移爾落罽塵

翰林院中感秋懷王質夫

王居仙
遊山

何處感時節新蟬禁中聞宮槐有秋意風夕花紛紛寄
跡鴛鴦行歸心鷗鶴羣唯有王居士知予憶白雲何日
仙遊寺潭前秋見君

禁中月

海上明月出禁中清夜長東南樓殿白稍稍上官牆淨
落金塘水明浮玉砌霜不比人間見塵土污清光

贈賣松者

一束蒼蒼色如從澗底來斲掘經幾日枝葉滿塵埃不
買非他意城中無地栽

初見白髮

白髮生一莖朝來明鏡裏勿言一莖少滿頭從此始青
山方遠別黃綬初從仕未料容鬢間蹉跎忽如此

別元九後詠所懷

零落桐葉雨蕭條槿花風悠悠早秋意生此幽閒中沉

與故人別中懷正無悰

祖紅切
樂也

勿云不相送心到青門

東相知豈在多但問同不同同心一人去坐覺長安空

禁中秋宿

風翻朱裏幕雨冷通中枕耿耿背斜燈秋牀一人寢

早秋曲江感懷

離離暑雲散嫋嫋涼風起池上秋又來荷花半成子朱

顏易消歇白日無窮已人壽不如山年光急於水青蕪
與紅蓼歲歲秋相似去歲此悲秋今我復來此

寄元九

身為近密拘心為名檢縛月夜與花時少逢杯酒樂唯
有元夫子閒來同一酌把手或酣歌展眉時笑謔今春
除御史前月之東洛別來未開顏塵埃滿樽杓蕙風晚
香盡槐雨餘花落秋意一蕭條離容兩寂寞況隨白日
老共負青山約誰識相念心羈鷹與籠鶴

春暮寄元九

梨花結成實燕卵化為雛時物又若此道情復何如但
覺日月促不嗟年歲徂浮生都是夢老小亦何殊唯與
故人別江陵初謫居時時一相見此意未全除

早梳頭

夜沐早梳頭牕明秋鏡曉颯然握中髮一沐知一少年
事漸蹉跎世緣方繳繞不學空門法老病何由了未得
無生心白頭亦為夭

出關路

山川函谷路塵土游子顏蕭條去國意秋風生故關

別舍弟後月夜

悄悄初別夜去住兩盤桓行子孤燈店居人明月軒平生共貧苦未必日成歡及此暫為別懷抱已憂煩況是庭葉盡復思山路寒如何為不念馬瘦衣裳單

新豐路逢故人

塵土長路晚風煙廢宮秋相逢立馬語盡日此橋頭知

君不得意鬱鬱來西遊惆悵新豐店何人識馬周

金鑾子晬日

晬將遂切子
生一歲曰晬

行年欲四十有女曰金鑾生來始周歲學坐未能言慙
非達者懷未免俗情憐從此累身外徒云慰目前若無
夭折患則有婚嫁牽使我歸山計應遲十五年

青龍寺早夏

塵埃經小雨地高倚長坡日西寺門外景氣含清和閒
有老僧立靜無凡客過殘鷺意思盡新葉陰涼多春去

來幾日夏雲忽差我朝朝感時節年鬢闌跼跼胡為戀
朝市不去歸煙蘿青山寸步地自問心如何

秋題牡丹叢

晚叢白露夕衰葉涼風朝紅艷久已歇碧芳今亦銷幽
人坐相對心事共蕭條

勸酒寄元九

薤葉有朝露槿枝無宿花君今亦如此促促生有涯既
不逐禪僧林下學楞伽又不隨道士山中煉丹砂百年

夜分半一歲春無多何不飲美酒胡然自悲嗟俗號消
愁藥神速無以加一杯驅世慮兩杯反天和三杯即酩
酊或笑任狂歌陶陶復兀兀吾孰知其他況在名利途
平生有風波深心藏陷窵巧言織網羅舉目非不見不
醉欲如何

曲江感秋

五年作

沙草新雨地岸柳涼風枝三年感秋意併在曲江池早
蟬已噤

連條切

啖

力至切

晚荷復離披前秋去秋思一一生

此時昔人三十二秋興已云悲我今欲四十秋懷亦可
知歲月不虛設此身隨日衰閭老不自覺直到鬢成絲

酬張太祝晚秋卧病見寄

高才淹禮寺短羽翔禁林西街居處遠北闕官曹深君
病不來訪我忙難往尋差池終日別寥落經年心露濕
綠蕪地月寒紅樹陰況茲獨愁夕聞彼相思吟上言歡
笑阻下嗟時歲侵容衰晚牕鏡思苦秋絃琴一章錦繡
段八韻瓊瑤音何以報珍重慙無雙南金

立秋日曲江憶元九

下馬柳陰下獨上堤上行故人千萬里新蟬三兩聲城
中曲江水江上江陵城兩地新秋思應同此日情

早朝賀雪寄陳山人

長安盈尺雪早朝賀君喜將赴銀臺門始出新昌里上
堤馬蹄滑中路蠟燭死十里向北行寒風吹破耳待漏
午門外候對三殿裏鬚鬢凍生冰衣裳冷如水忽思仙
遊谷闍謝陳居士暖覆褐裘眠日高應未起

初與元九別後忽夢見之及寤而書適至無寄

桐花詩悵然感懷因以此寄

元九初
謫江陵

永壽寺中語新昌坊北分歸來數行淚悲事不悲君悠
悠藍田路自去無消息計君食宿程已過商山北昨夜
雲四散千里同月色曉來夢見君應是君相憶夢中握
君手問君意何如君言苦相憶無人可寄書覺來未及
說叩門聲瑟瑟言是商州使送君書一封枕上忽驚起
顛倒著衣裳開絨見手札一紙十三行上論遷謫心下

說離別腸心腸都未盡不暇敘炎涼云作此書夜夜宿
商州東獨對孤燈坐陽城山館中夜深作書畢山月向
西斜月前何所有一樹紫桐花桐花半落時復道正相
思殷勤書背後兼寄桐花詩桐花詩八韻思緒一何深
以我今朝意憶君此夜心一章一遍讀一句十回吟珍
重八十字字字化為金

和元九悼往

感舊蚊
惻作

美人別君去自去無處尋舊物零落盡此情安可任唯

有韻

胡結切

紗幌塵埃日夜侵馨香與顏色不似舊時深

透影燈耿耿籠光月沉沉中有孤眠客秋涼生夜衾舊
宅牡丹院新墳松柏林夢中咸陽淚覺後江陵心含此
隔年恨發為中夜吟無論君自感聞者欲沾巾

重到渭上舊居

舊居清渭曲開門當蔡渡十年方一還幾欲迷歸路追
思昔日行感傷故游處插柳作高林種桃成老樹因驚
成人者盡是舊童孺試問舊老人半為遶村墓浮生同

過客前後遞來去白日如弄珠出入光不住人物日改
變舉目悲所遇回念念我身安得不衰暮朱顏銷不歇
白髮生無數唯有山門外三峰色如故

白髮

白髮知時節闇與我有期今朝日陽裏梳落數莖絲家
人不慣見憫默為我悲我云何足怪此意爾不知凡人
年三十外壯中已衰但思寢食味已減二十時況我年
四十本來形貌羸書魔昏兩眼酒病沉四肢親愛日零

落在者仍別離身心久如此白髮生已遲由來生老死
三病長相隨除却念無生人間無藥治

秋日

池殘零落水牕下悠揚日嫋嫋秋風多槐花半成實下
有獨立人年來四十一

將之饒州江浦夜泊

明月滿深浦愁人獨卧舟煩寃寢不得夏夜長於秋苦
乏衣食資遠為江海游光陰坐遲暮鄉國行阻修身病

向鄱陽家貧寄徐州前事與後事豈堪心併憂憂來起
長望但見江水流雲樹靄蒼蒼煙波淡悠悠故園迷處
所一望堪白頭

思歸

時初為
校書郎

養無晨膳隱無伏膳資遂求及親祿僂俛來京師薄
俸未及親別家已經時冬積溫席戀春違采蘭期夏至
一陰生稍稍夕漏遲塊然抱愁者長夜獨先知悠悠鄉
關路夢去身不隨坐惜時節變蟬鳴槐花枝

冀城北原作

野色何莽蒼

去聲

秋聲亦蕭疎風吹黃埃起落日驅征車

何代此開國封疆百里餘古今不相待朝市無常居昔
人城邑中今變為丘墟昔人墓田中今化為里閭廢興
相催迫日月互居諸世變無遺風焉能知其初行人千
載後懷古空躊躇

客路感秋寄明準上人

日暮天地冷雨霽山河清長風從西來草木凝秋聲已

感歲條忽復傷物凋零孰能不慙悽天時牽人情借問
空門子何法易修行使我忘得心不教煩惱生

游襄陽懷孟浩然

楚山碧巖巖漢水碧湯湯秀氣結成象孟氏之文章今
我諷遺文思人至其鄉清風無人繼日暮空襄陽南望
鹿門山藹若有餘芳舊隱不知處雲深樹蒼蒼

秋暮西歸途中書情

耿耿旅燈下愁多常少眠思鄉貴早發發在鷄鳴前九

月草木落平蕪連遠山秋陰和曙色萬木蒼蒼然去秋
偶東遊今秋始西旋馬瘦衣裳破別家來二年憶歸復
愁歸歸無一囊錢心雖非蘭膏安得不自然

秋懷

月出照北堂光華滿堦墀涼風從西至草木日夜衰桐
柳減綠陰蕙蘭消碧滋感物私自念我心亦如之安得
長少壯盛衰迫天時人生如石火為樂長苦遲

別楊穎士盧克柔殷堯藩

倦鳥暮歸林浮雲晴歸山獨有行路子悠悠不知還人
生苦營營終日羣動閒所務雖不同同歸於不閒扁舟
來楚鄉足馬往秦關離憂繞心曲宛轉如循環且持一
杯酒聊以閒愁顏

題贈定光上人

二十身出家四十心離塵得徑入大道乘此不退輪一
坐十五年林下秋復春春花與秋氣不感無情人我來
如有悟潛以心照身誤落聞見中憂喜傷形神安得遺

耳目冥然反天真

祇役駱口驛喜蕭侍御書至兼觀新詩吟諷通

宵因寄八韻

時為藍
屋尉

日暮心無悒

連條切

吏役正營營忽驚芳信至復與新詩

并是時天無雲山館有月明月下讀數遍風前吟一聲
一吟三四歎聲盡有餘清雅哉君子文詠性不詠情使
我靈府中鄙悵不得生始知聽韶濩可使心和平

酬李少府曹長官舍見贈

低腰復斂手心體不遑安一落風塵下始知為吏難公
事與日長宦情隨歲闌惆悵青袍袖芸香無半殘賴有
李夫子此懷聊自寬兩心如止水彼此無波瀾往往簿
書暇相勸強為歡白馬晚蹋雪綠觴春煖寒戀月夜同
宿愛山晴共看野性自相近不是為同官

留別

秋涼卷朝簾春煖撤夜衾雖是無情物欲別尚沉吟況
與有情別別隨情淡深二年歡笑意一旦東西心獨留

誠可念同行力不任前事詎能料後期諒難尋唯有潺
湲淚不惜共沾衿

曉別

曉鼓聲已半離筵坐難久請君斷腸歌送我和淚酒月
落欲明前馬嘶初別後浩浩闔塵中何由見回首

北園

北園東風起雜花次第開心知須臾落一日三四來花
下豈無酒欲酌復遲迴所思眇千里誰勸我一杯

惜梢李花

花細而繁色艷而黠亦花中之有思者連哀易落故惜之耳

樹小花鮮妍香繁條軟弱高低二三尺重疊千萬萼朝
艷靄霏霏夕凋紛漠漠辭枝朱粉細覆地紅綃薄由來
好顏色常苦易銷鑠不見魯堂切蕩花狂風吹不落

照鏡

皎皎青銅鏡班班白絲鬢
宣復更藏年實年君不信

新秋

西風飄一葉庭前颯已涼
風池明月水衰蓮白露房
其

奈江南夜縣縣自此長

夜雨

早蛩啼復歇殘燈滅又明
隔窓知夜雨芭蕉先有聲

秋江送客

秋鴻次第過哀猿朝夕聞
是日孤舟客此地亦離羣
濛濛衣雨漠漠冒帆雲
不醉潯陽酒煙波愁殺人

感逝寄遠

寄通州嚴侍御果州崔員外
澧州李舍人鳳州李郎中

昨日聞甲死今朝聞乙死
知識三分中二分化為鬼逝

者不復見悲哉長已矣存者今如何去我皆萬里平生
知心者屈指能有幾通果澧鳳州眇然四君子相思俱
老大浮世如流水應歎舊交遊凋零日如此何當一杯
酒開眼笑相視

秋月

夜初色蒼然夜深光浩然稍轉西廊下漸滿南牕前
沉是綠蕪地復茲清露天落葉聲策策驚鳥影翩翩
棲禽尚不穩愁人安可眠

白氏長慶集卷九

欽定四庫全書

白氏長慶集卷十

唐白居易撰

感傷二

古調詩五言
凡七十八首

朱陳村

徐州古豐縣有村曰朱陳去縣百餘里桑麻青氛氤機
梭聲札札牛驢走紆紆女汲澗中水男採山上薪縣遠
官事少山深人俗淳有財不行商有丁不入軍家家守

村業頭白不出門生為陳村民死為陳村塵田中老與

幼相見何欣欣一村唯兩姓世世為婚姻

其村唯朱陳二姓而已

親疎居有族少長游有羣黃雞與白酒歡會不隔旬生

者不遠別嫁娶先近鄰死者不遠塋墳墓多遶村既安

生與死不苦形與神所以多壽考往往見玄孫我生禮

義鄉少小孤且貧徒學辨是非祇自取辛勤世法貴名

教士人重冠婚以此自桎梏信為大謬人十歲解讀書

十五能屬文二十舉秀才三十為諫臣下有妻子累上

有君親恩承家與事國望此不肖身憶昨旅游初迄今
十五春孤舟三適楚羸馬四經秦晝行有飢色夜寢無
安寃東西不暫住來往若浮雲離亂失故鄉骨肉多散
分江南與江北各有平生親平生終日別近者隔年聞
朝憂卧至暮夕哭坐達晨悲苦燒心曲愁霜侵髻根一
生苦如此長羨陳村民

讀鄧魴詩

塵架多文集偶取一卷披未及看姓名疑是陶潛詩看

名知是君惻惻令我悲詩人多蹇厄近日誠有之京兆
杜子美猶得一拾遺襄陽孟浩然亦聞髻成絲嗟君兩
不如三十在布衣擢第祿不及新婚妻未歸少年無疾
患苦盡切死於路岐天不與爵壽唯與好文詞此理勿
復道巧歷不能推

寄元九

晨雞纔發聲夕雀俄斂翼晝夜往復來疾如出入息非
徒改年貌漸覺無心力自念因念君俱為老所逼君年

雖校少顛顛謫南國三年不放歸炎瘴消顏色山無殺
草霜水有含沙蜮健否遠不知書多隔年得願君少愁
苦我亦加飡食各保金石軀以慰長相憶

秋夕

葉聲落如雨月色白似霜夜深方獨卧誰為拂塵牀

夜雨

我有所念人隔在遠遠鄉我有所感事結在深深腸鄉
遠去不得無日不瞻望腸深解不得無夕不思量況此

殘燈夜獨宿在空堂
秋天殊未曉風雨正蒼蒼
不學頭陀法前心安可忘

秋霽

金木不相待炎涼雨中變
林晴有殘蟬巢冷無留燕
沉吟卷長簾愴惻收團扇
向夕稍無泥閒步青苔院
月出砧砧動家家擣秋練
獨對多病妻不能理針線
冬衣殊未製夏服行將綻
何以迎早秋一盃聊自勸

歎老三首

晨興照青鏡形影兩寂寞少年辭我去白髮隨梳落萬
化成於漸漸衰看不覺但恐鏡中顏今朝老於昨人年
少滿百不得長歡樂誰謂天地心千齡與龜鶴吾聞善
醫者今古稱扁鵲萬病皆可治唯無治老藥

我有一握髮梳理何稠直昔似玄雲光今如素絲色匣
中有舊鏡欲照先歎息自從頭白來不欲明磨拭顰頭
與鶴頸至老常如墨獨有人髻毛不得終身黑

前年種桃核今歲成花樹去歲新嬰兒今年已學步但

驚物長成不覺身衰暮去矣欲何如少年留不住因書
今日意徧寄諸親故壯歲不歡娛長年當悔悟

送兄弟回雪夜

日晦雲氣黃東北風切切時從村南還新與兄弟別離
襟淚猶溼迴馬嘶未歇欲歸一室坐天陰多無月夜長
火消盡歲暮雨凝結寂寞滿爐灰飄零上堦雪對雪畫
寒灰殘燈明復滅灰死如我心雪白如我髮所遇皆如
此頃刻堪愁絕迴念入坐忘轉憂作禪悅平生洗心法

正為今宵設

溪中早春

南山雪未盡陰嶺留殘白
西澗冰已消春溜含新碧
東風來幾日蟄動萌草拆
潛知陽和功一日不虛擲
愛此天氣暖來拂溪邊石
一坐欲忘歸暮禽聲嘖嘖
蓬蒿隔桑棗隱映煙火夕
歸來問夜食家人烹齋麥

同友人尋澗花

聞有澗底花賞得村中酒
與君來校遲已逢搖落後
臨

觴有遺恨悵望空溪口記取花發時期君重攜手我生
日日老春色年年有且作來歲期未知身健否

登村東古塚

高低古時塚上有牛羊道獨立最高頭悠哉此懷抱回
頭向村望但見荒田草村人不愛花多種粟與棗自來
此村住不覺風光好花少鶯亦稀年年春闍老

夢裴相公

五年生死隔一夕寃夢通夢中如往日同直金鑾宮髣

髯金紫色分明水玉容
勤勤相眷意亦與平生同
既寤知是夢惘然情未終
追想當時事何殊昨夜中
自我學心法萬緣成一空
今朝為君子流淚一沾曾

晝寢

坐整白單衣起穿黃草屨
朝飡鹽漱畢徐下堦前步
暑風微變候晝刻漸加數
院靜地陰陰鳥鳴新葉樹
獨行還獨卧夏景殊未暮
不作午時眠日長安可度

別行簡

時行簡辟廬坦
劍南東川府

漠漠病眼花
星星愁鬢雪
筋骸已衰憊
形影仍分訣
梓州二千里
劍門五六月
豈是遠行時
火雲燒棧熱
何言巾上淚
乃是腸中血
念此早歸來
莫作經年別

觀兒戲

齟

田聊切

齟

初謹切

七八歲綺紈三四兒弄塵
復鬪草盡日

樂嬉嬉堂上長年客
髻間新有絲
一看竹馬戲
每憶童騃時
童騃饒戲樂
老大多憂悲
靜念彼與此
不知誰是癡

嘆常生

西村常氏子卧疾不須臾前旬猶訪我今日忽云徂時
我病多暇與之同野居園林青藹藹相去數里餘村鄰
無好客所遇唯農夫之子如何者往還猶勝無于今亦
已矣可為一長吁

寄元九

一病經四年親朋書信斷窮通各易交自笑知何晚元
君在荆楚去日唯云遠彼獨侶何人心如石不轉憂我

貧病身書來唯勸勉上言少愁苦下道加食飯憐君為
謫吏窮薄家貧福三寄衣食資數盈二十萬豈是貪衣
食感君心繾綣念我口中食分君身上暖不因身病久
不因命多蹇平生親友心豈得知深淺

以鏡贈別

人言似明月我道勝明月明月非不明一年十二缺豈
如玉匣裏如水常清徹月破天閨時圓明獨不歇我慙
貌醜老繞鬢班班雪不如贈少年迴照青絲髮因君千

里去持此將為別

城上對月期友人不至

古人惜晝短勸令秉燭遊況此迢迢夜明月滿西樓復
有樽中酒置在城上頭期君君不至人月兩悠悠照水
煙波白照人肌髮秋清光正如此不醉即須愁

念金鑾子二首

衰病四十身嬌癡三歲女非男猶勝無慰情時一撫一
朝捨我去覓影無處所況念天札時嘔啞初學語始知

骨肉愛乃是憂悲聚唯思未有前以理遣傷若忘懷日
已久三度移寒暑今日一傷心因逢舊乳母

與爾為父子八十有六旬忽然又不見邇來三四春形
質本非實氣聚偶成身恩愛元是妄緣合暫為親念茲
底有悟聊用遣悲辛暫將理自奪不是忘情人

對酒

人生一百歲通計三萬日何況百歲人人間百無一賢
愚共零落貴賤同埋沒東岱前後覓北邙新舊骨復聞

藥誤者為愛長生術又有憂死者為貪政事筆藥誤不
得老憂死非因疾誰言人最靈知得不知失何如會親
友飲此杯中物能沃煩慮消能陶真性出所以劉阮輩
終年醉兀兀

渭村雨歸

渭水寒漸落離離蒲稗

薄賣切

苗閒傍沙邊立看人刈葦

苔近水風景冷晴明猶寂寥復茲夕陰起野思重蕭條
蕭條獨歸路暮雨濕村橋

諭懷

黑頭日已白白面日已黑人生未死閒變化何終極常
言在已者莫若形與色一朝改變來止遏不能得況彼
身外事悠悠通與塞

喜友至留宿

村中少賓客柴門多不開忽聞車馬至云是故人來況
值風雨夕愁心正悠哉願君且同宿盡此手中杯人生
開口笑百年都幾回

西原晚望

花菊引閒行行上西原路原上晚無人因高聊四顧南
阡有煙火北陌連墟墓村鄰何蕭條近者猶百步吾廬
在其下寂寞風日暮門外轉枯蓬籬根伏寒兔故園汙
水下離亂不堪去近歲始移家飄然此村住新屋五六
間古槐八九樹便是衰病身此生終老處

感鏡

美人與我別留鏡在匣中自從花顏去秋水無芙蓉經

年不開匣紅塵覆青銅今朝一拂拭自顧顚顚容照罷
重惆悵背後雙盤龍

村居卧病三首

戚戚抱羸病悠悠度朝暮夏木纔結陰秋蘭已含露前
日巢中卵化為雛飛去昨日穴中蟲蛻翰為切為蟬上樹

四時未嘗歇一物不暫住唯有病客心沉然獨如故

新秋久病客起步村南道盡日不逢人蟲聲徧荒草西
風吹白露野綠秋仍早草木猶未傷先傷我懷抱朱顏

與玄鬢強健幾時好況為憂病侵不得依年老

種黍三十畝雨來苗漸大種薤二十畦秋來欲堪刈望
黍作冬酒留薤為春菜荒村百物無待此養衰瘵葺廬
備陰雨補褐防寒歲病身知幾時且作明年計

沐浴

經年不沐浴塵垢滿肌膚今朝一澡濯衰瘦頗有餘老
色頭鬢白病形肢體虛衣寬有賸帶髮少不勝梳自問
今年幾春秋四十初四十已如此七十復何如

栽松二首

小松未盈尺心愛手自移蒼然澗底色雲濕煙霏霏栽
植我年晚長成君性遲如何過四十種此數寸枝得見
成陰否人生七十稀

愛君抱晚節憐君含直丈欲得朝朝見堦前故種君知
君死則已不死會凌雲

病中友人相訪

卧久不記日南窓昏復昏蕭條草簷下寒雀朝夕聞強

扶床前杖起向庭中行偶逢故人至便當一逢迎移榻就斜日披裘倚前楹閒談勝服藥稍覺有心情

自覺二首

四十未為老憂傷早衰惡前歲二毛生今年一齒落形骸日損耗心事同蕭索夜寢與朝飡其間味亦薄同歲崔舍人容光方灼灼始知年與貌衰盛隨憂樂畏老老轉逼憂病病彌縛不畏復不憂是除老病藥

朝哭心所愛暮哭心所親親愛零落盡安用身獨存幾

許平生歡無限骨肉恩結為腸閒痛聚作鼻頭辛悲來
四肢緩泣盡雙眸昏所以年四十心如七十人我聞浮
圖教中有解脫門置心為止水視身如浮雲抖擻垢穢
衣度脫生死輪胡為戀此苦不去猶逡巡回念發弘願
願此見在身但受過去報不結將來因誓以智慧水永
洗煩惱塵不將恩愛子更種悲憂根

夜雨有念

以道治心氣終歲得晏然何乃戚戚意忽來風雨天既

非慕榮顯又不恤饑寒胡為悄不樂抱膝殘燈前形影
闇相問心默對以言骨肉能幾人各在天一端吾兄寄
宿州吾弟客東川南北五千里吾身在中間欲去病未
能欲住心不安有如波上舟此縛而被牽自我向道來
于今六七年鍊成不二性消盡萬千緣唯有恩愛火往
往猶熬煎豈是藥無効病多難盡蠲

寄楊六

楊攝萬年縣尉
予為贊善大夫

青宮官冷靜赤縣事繁劇一閒復一忙動作經時隔清

觴久未酌白日頓虛擲念此忽踟躕悄然心不適豈無
舊交結久別或遷易亦有新往還相見多形迹唯君於
我分堅久如金石何況老大來人情重婚戚會稀歲月
急此事真可惜幾回開口笑便到髭鬚白公門苦鞅掌
盡日無閒隙猶冀乘暝來靜言同一夕

送春

三月三十日春歸日復暮惆悵問春風明朝應不住送
春曲江上眷眷東西顧但見撲水花紛紛不知數人生

似行客兩足無停步日日進前程前程幾多路
兵刀與水火盡可違之去唯有老到來人間無
避處感時良為已獨倚池南樹今日送春心心
如別親故

哭李三

去年渭水曲秋時訪我來今年常樂里春日
哭君回哭君仰問天天意安在哉若必奪其壽
何如不與才落然身後事妻病女嬰孩

別李十一後重寄

自此後詩在
江州路上作

秋日正蕭條驅車出蓬萊回望青門道目極心鬱鬱豈
獨戀鄉土非關慕簪紱所愴別李君平生同道術俱承
金馬詔聯東諫臣筆共上青雲梯中途一相失江湖我
方往朝廷君不出蕙帶與華簪相逢是何日

初出藍田路作

停驂問前路路在秋雲裏蒼蒼縣南道去途從此始絕
頂忽盤上衆山皆下視下視千萬峯峯頭如浪起朝經
韓公坂夕次藍橋水潯陽僅四千始行七十里人煩馬

蹄跼勞苦已如此

仙娥峯下作

我為東南行始登高山道高山無數峯最愛仙娥好參

差樹若插匱

過合切

匝雲如抱渴望寒玉泉香聞紫芝草

青崖屏削碧白石床鋪縞向無如此物安足留四皓感
彼私自問歸山何不早可能塵土中還隨衆人老

微雨夜行

漠漠秋雲起悄悄夜寒生但覺衣裳濕無點亦無聲

再到襄陽訪問舊居

昔到襄陽日髣髴初有髭今過襄陽日髭鬢半成絲舊
遊都是夢乍到忽如歸東郭蓬蒿宅荒涼今屬誰故知
多零落閭井亦遷移獨有秋江水煙波似舊時

寄微之三首

江州望通州天涯與地末有山萬丈高有江千里濶間
之以雲霧飛鳥不可越誰知千古險為我二人設通州
君初到鬱鬱愁如結江州我方去迢迢行未歇道路日

乖隔音信日斷絕因風欲寄語地遠聲不徹生當復相逢死當從此別

君遊襄陽日我在長安住君今在通州我過襄陽去襄陽九里郭樓雉連雲樹顧此稍依依是君舊遊處蒼茫蕪葭水中有潯陽路此去更相思江西少親故

去國日已遠喜逢物似人如何含此意江上坐思君有如河嶽氣相合方氛氤狂風吹中絕兩處成孤雲風迴終有時雲合豈無因努力各自愛窮通我爾身

喜逢一作稀逢

舟中雨夜

江雲閣悠悠江風冷修修夜雨滴船背風浪打船頭船
中有病客左降向江州

夜聞歌者

宿鄂州

夜泊鸚鵡洲秋江月澄徹鄰船有歌者發調堪愁絕歌
罷繼以泣泣聲通復咽尋聲見其人有婦顏如雪獨倚
帆檣立娉婷十七八夜淚如真珠雙雙墮明月借問誰
家婦歌泣何淒切一問一沾襟低眉終不說

江樓聞砧

江州作

江人授衣晚十月始聞砧一夕高樓月萬里故園心

宿東林寺

經窓燈焰短僧爐火氣深索落廬山夜風雪宿東林

憶洛下故園

時淮汝寇
戎未滅

潯陽遷謫地洛陽離亂年煙塵三川上炎瘴九江邊
心坐如此秋風仍颯然

贈別崔五

朝送南去客暮迎北來賓孰云當大路少遇心所親勞
者念息肩熱者思濯身何如獨愁日忽見平生人平生
已不淺是日重殷勤問從何處來及此江亭春江天春
多陰夜月隔重雲移樽樹間飲燈照花紛紛一會不易
得餘事何足云明旦又分手今夕且歡忻

春晚寄微之

三月江水闊悠悠桃花波年芳與心事此地兩蹉跎南
國方譴謫中原正兵戈眼前故人少頭上白髮多通州

更迢遞春盡復如何

漸老

今朝復明日不覺年齒暮白髮逐梳落朱顏辭鏡去當
春頗愁寂對酒寡歡趣遇境多愴辛逢人益敦故形質
屬天地推遷從不住所怪少年心銷磨落何處

送幼史

淮右寇未散江西歲再徂故里干戈地行人風雪途此
時與爾別江畔立踟躕

夜雪

已訝衾枕冷復見窓戶明夜深知雪重時聞折竹聲

寄行簡

鬱鬱眉多斂默默口寡言豈是願如此舉目誰與歡去
春爾西征從事巴蜀間今春我南謫抱疾江海壖而緣切
相去六千里地絕天邈然十書九不達何以開憂顏渴
人多夢飲飢人多夢食春來夢何處合眼到東川

首夏

孟夏百物滋動植一時好康鹿樂深林蟲蛇喜豐草翔
禽愛密葉游鱗悅新藻天和遺漏處而我獨枯槁一身
在天末骨肉皆遠道舊國無來人冠戎塵浩浩沉憂竟
何益祇自勞懷抱不如放身心冥然任天造潯陽多美
酒可使杯不燥湓魚賤如泥烹炙無昏早朝飯山下寺
暮醉湖中島何必歸故鄉茲焉可終老

孟夏思渭村舊居寄舍弟

嘖嘖雀引雛稍稍笋成竹時物感人情思我故鄉曲故

園渭水上十載事樵牧手種榆柳成陰陰覆牆屋兔隱
豆苗肥鳥鳴桑椹熟前年當此時與爾同遊矚詩書課
弟姪農圃資童僕日暮麥登場天晴蠶拆簇弄泉南澗
坐待月東亭宿興發飲數杯悶來棋一局一朝忽分散
萬里仍羈束并鮒思反泉籠鶯悔出谷九江地卑濕四
月天炎燠苦雨初入梅瘴雲稍含毒泥秧水畦稻灰種
畝田粟已訝殊歲時人嗟異風俗閒登郡樓望日落江
山綠歸雁拂鄉心平湖斷人目殊方我漂泊舊里君幽

獨何時同一瓢飲水心亦足

早蟬

六月初七日江頭蟬始鳴石楠深葉裏薄暮兩三聲一
催衰鬢色再動故園情西風殊未起秋思先秋生憶昔
在東掖宮槐花下聽今朝無限思雲樹遶湓城

感情

中庭曬服翫忽見故鄉履昔贈我者誰東隣嬋娟子因
思贈時語特用結終始永願如履綦雙行復雙止自吾

謫江郡漂蕩三千里為感長情人提攜同到此今朝一
惆悵反覆看未已人隻履猶雙何曾得相侶可嗟復可
惜錦表繡為裏況經梅雨來色黯花草死

南湖晚秋

八月白露降湖中水方老旦夕秋風多衰荷半傾倒手
攀青楓樹足蹋黃蘆草慘淡老容顏零落秋懷抱有兄
在淮楚有弟在蜀道萬里何時來煙波白浩浩

郡廳有樹晚榮早凋人不識名因題其上

潯陽郡廳後有樹不知名秋先梧桐落春後桃李榮五
月始萌動八月已凋零左右皆松桂四時鬱青青豈量
雨露恩沾濡不均平榮枯各有分天地本無情而我亦
相類早衰向晚成形骸少多病三十不豐盈毛髮早改
變四十白髭生誰教兩蕭索相對此江城

感秋懷微之

葉下湖有波秋風此時至誰知蘆落心先納蕭條氣推
移感時歲漂泊思同志昔為煙霞侶今作泥塗吏白鷗

毛羽弱青鳳文章異各閉一籠中歲晚同傾頤

因沐感髮寄朗上人二首

年長身轉慵百事無所欲乃至頭上髮經年方一沐
沐稀髮苦落一沐仍半禿短鬢經霜蓬老面辭春木強年
過猶近衰相來何速應是煩惱多心焦血不足

漸少不滿把漸短不盈尺況茲短少中日夜落復白既
無神仙術何除老死籍祇有解脫門能度衰苦厄掩鏡
望東寺降心謝禪客衰白何足言剃落猶不惜

早蟬

月出先照山風生先動水亦如早蟬聲先入閒人耳一
閒愁意結再聽鄉心起渭上新蟬聲先聽渾相似衡門
有誰聽日暮槐花裏

苦熱喜涼

經時苦炎熱心體但煩倦白日一何長清秋不可見歲
功成者去天數極則變潛知寒燠閒遷次如乘傳火雲
忽朝斂金風俄夕扇簟枕遂清涼筋骸稍康健因思望

月侶好卜迎秋宴竟夜無客來引杯還自勸

早秋晚望兼呈韋侍郎

九派繞孤城城高生遠思人煙半在船野水多於地穿
霞日脚直驅雁風頭利去國來幾時江上秋三至夫君
亦淪落此地同漂寄憫然向隅心摧頽觸籠翅且謀眼
前計莫問曾中事潯陽酒甚濃相勸時時醉

司馬宅

雨徑綠蕪合霜園紅葉多蕭條司馬宅門巷無人過唯

對大江水秋風朝夕波

司馬廳獨宿

荒涼滿庭草偃亞侵簷竹府吏下廳簾家僮開被幙數
聲城上漏一點窓前燭官曹冷侶冰誰肯來同宿

夢與李七庾三十三同訪元九

夜夢歸長安見我故親友損之在我左順之在我右云
是二月天春風出攜手同過靖安里下馬尋元九元九
正獨坐見我笑開口還指西院花仍開北亭酒如言各

有故侶惜歡難久神合俄頃閒神離久伸後覺來疑在
側求索無所有殘燈影閃牆斜月光穿牖天明西北望
萬里君知否老去無見期踟躕搔白首

秋槿

風露颯已冷天色亦黃昏中庭有槿花榮落同一晨秋
開已寂寞夕殞何紛紛正憐少顏色復嘆不逡巡感此
因念彼懷哉聊一陳男兒老富貴女子晚婚姻頭白始
得志色衰方事人後時不獲已安得如青春

荅元郎中楊員外喜烏見寄

四十四
字成

南宮鴛鴦地何忽烏來止故人錦帳郎聞烏笑相視疑
烏報消息望我歸鄉里我歸應待烏頭白慙愧元郎誤

歡喜



白氏長慶集卷十

欽定四庫全書

集部

白氏長慶集卷十二

詳校官監察御史_臣查瑩

檢討_臣何思鈞覆勘

總校官知縣_臣繆琪

校對官助教_臣卜惟吉

謄錄監生_臣袁瑩

欽定四庫全書

白氏長慶集卷十一

唐白居易撰

感傷三

古體詞 五言五十三首

初入峽有感

上有萬仞山下有千丈水蒼蒼兩崖間闊狹容一葦瞿
塘呀切牛加直瀉灩澦屹中峙未夜黑巖昏無風白浪起
大石如刀劍小石如牙齒一步不可行況千三百里
峽自

州至忠州艱險相繼凡一千三百里

苒弱

如灼切

竹箴簪

音

念鼓危檝師趾一

跌無完舟吾生繫於此常聞仗忠信蠻貊可行矣自古
漂流人豈盡非君子況吾時與命蹇舛不足恃常恐不
才身復作無名死

過昭君村

村在歸州東北四十里

靈珠產無種彩雲出無根亦如彼妹子生此遐陋村至
麗物難掩遽選入君門獨美衆所嫉終棄出塞垣唯此
希代色豈無一顧恩事排勢須去不得由至尊白黑既

可變丹青何足論
竟埋代北骨不返巴東
魂慘淡晚雲
水依稀舊鄉園
妍姿化已久但有村名存
村中有遺老
指點為我言
不取往者戒
恐貽來者冤
至今村女面
燒灼成癍痕

自江州至忠州

前在潯陽日已歎
賓朋寡忽忽抱憂懷
出門無處寫
今來轉深僻
窮峽巔山下五月斷行舟
濫堆正如馬巴人
類猿狖

尤救切

矍鑠滿山野
敢望見交親
喜逢似人者

初到忠州登東樓寄萬州楊八使君

山東邑居窄峽牽氣候偏林巒少平地霧雨多陰天隱
隱煮鹽火漠漠燒畬

牛居切

煙賴此東樓夕風月時翛然

憑軒望所思目斷心涓涓背春有去鴈上水無來船我
懷巴東守乃是關西賢平生已不淺流落重相憐水梗
漂萬里籠禽囚五年新恩同雨露遠郡鄰山川書信雖
往復封疆徒接連其如美人面欲見杳無緣

郡中

鄉路音信斷山城日月遲欲知州近遠塔前摘荔枝

西樓夜

悄悄復悄悄城隅隱林杪山郭燈火稀峽天星漢少年
光東流水生計南枝鳥月沒光沈沈西樓殊未曉

東樓曉

脈脈復脈脈東樓無宿客城闌雲霧多峽深田地窄
宵燈尚留焰晨禽初展翮欲知山高低不見東方白

寄王質夫

憶始識君時愛君世緣薄我亦吏王畿不為名利著

直畧

切春尋仙遊洞秋上雲居閣樓觀水潺潺

鈕山切

龍潭花

漠漠吟詩石上坐引酒泉邊酌因話出處心心期老巖

壑忽從風雨別遂被簪纓縛君作出山雲我為入籠鶴

籠深鶴憔悴山遠雲飄泊去處雖不同同負平生約今

來各何在老去隨所託我守巴南城君佐征西幕年顏

漸衰頽

悉合切

生計仍蕭索方含去國愁且羨從軍樂

洛音

舊遊疑是夢往事思如昨相憶春又深故山花正落

南賓郡齋即事寄楊萬州

山上巴子城山下巴江水中窮獨人強名為刺史時

時竊自哂刺史豈如是倉粟餽家人黃縑裏妻子

忠州刺史

已下悉以畲田粟給祿食黃絹充俸

莓苔翳冠帶霧雨霾

音埋雨土蒙茂也

樓雉

衙鼓暮復朝郡齋卧還起回首望南浦亦在煙波裏而我復何嗟夫君猶滯此

招蕭處士

峽內豈無人所逢非所思門前亦有客相對不相知仰

望但雲樹俯顧惟妻兒寢食起居外端然無所為東郊
蕭處士聊可與開眉能飲滿杯酒善吟長句詩庭前吏
散後江畔路乾時請君攜竹杖一赴郡齋期

庭槐

南方饒竹樹唯有青槐稀十種七八死縱活亦支離何
此郡庭下一株獨華滋蒙蒙碧煙葉嫋嫋黃花枝我家
渭水上此樹蔭前墀忽向天涯見憶在故園時人生有
情感遇物牽所思樹木猶復爾況見舊親知

送客回晚興

城上雲霧開沙頭風浪定參差亂山出淡沔平江淨行
客舟已遠居人酒初醒嫋嫋秋竹梢已蟬聲似磬

東樓竹

瀟灑城東樓遶樓多修竹森然一萬竿白粉封青玉捲
簾睡初覺欹枕看未足影轉色入樓牀席生浮綠空城
絕賓客向夕彌幽獨樓上夜不歸此君留我宿

九日登巴臺

黍香酒初熟菊暖花未開閒聽竹枝曲淺酌茱萸杯去
年重陽日漂泊湓城隈今歲重陽日蕭條巴子臺旅鬢
尋已白鄉書久不來臨觴一搔首座客亦徘徊

東城尋春

老色日上面歡情日去心今既不如昔後當不如今今
猶未甚衰每事力可任花時仍愛出酒後尚能吟但恐
如此興亦隨日消沈東城春欲老勉強一來尋

江上送客

江花已萎絕江草已消歇
遠客何處歸孤舟今日發
杜鵑聲似哭湘竹斑如血
共是多感人仍為此中別

桐花

春令有常候清明桐始發
何此巴峽中桐花開十月
豈伊物理變信是土宜別
地氣反寒暄天時倒生殺
草木

堅強物所稟固難奪風候一參差
榮枯遂乖刺郎達切沉

吾北人性不耐乃帶切南方熱強羸
壽夭間安得依時節

早祭風伯因懷李十一舍人

遠郡雖徧陋時祀奉朝經夙興祭風伯天氣曉冥冥導

騎與從吏引我出東垆

涓熒切

水霧重如雨山火高於星

忽憶早朝日與君趨紫庭步登龍尾道却望終南青一

別身向老所思心未寧至今想在耳玉音尚玲玲

花下對酒二首

藹藹江氣春南賓閨正月梅櫻與桃杏次第城上發紅
房爛簇火素豔紛團雪香惜委風飄愁牽壓枝折樓中
老太守頭上新白髮冷淡病心情暄和好時節故園音

信斷遠郡親賓絕欲問花前樽依然為誰設

引手攀紅櫻紅櫻落似霰

先見切

仰首看白日白日委如

箭年芳與時景頃刻猶衰變況是血肉身安能長強健
人心苦迷執慕貴憂貧賤愁色常在眉歡容不上面況
吾頭半白把鏡非不見何必花下杯更待他人勸

不二門

兩眼日將闔四肢漸衰瘦束帶賸

以証切

昔圍穿衣妨

去聲

寬袖流年似江水奔注無昏晝志氣與形骸安得長依

舊亦曾登玉陛舉措多紕

篇夷切

繆至今金闕籍名姓獨

遺漏亦曾燒大藥消息乖火候至今殘丹砂燒乾不成
就行藏事兩失憂惱心交鬪化作顛翁拋身在荒陋
坐看老病逼須得醫王救唯有不二門其間無天壽

我身

我身何所似似彼孤生蓬秋霜剪根斷浩浩隨長風昔
於秦雍間今落巴蠻中昔為意氣郎今作寂寞翁外貌
雖寂寞中懷頗冲融賦命有厚薄委心任窮通通當為

大鵬舉翅摩蒼穹窮則為鷓鴣一枝足自容苟知此道者身窮心不窮

哭王質夫

仙遊寺前別別來十年餘生別猶怏怏死別復何如客從梓潼來道君死不虛驚疑心未信欲哭復踟踟寢門側聲發淚亦俱衣上今日淚篋中前月書憐君古人風重有君子儒篇詠陶謝輩風襟嵇阮徒出身既蹇屯生世仍須臾誠知天至高安得不一呼江南有毒蟒

江北有妖狐皆享千年壽多於王質夫不知彼何德不識此何辜

東坡種花二首

持錢買花樹城東坡上栽但購有花者不限桃杏梅百果參雜種千枝次第開天時有早晚地力無高低紅者霞豔豔白者雪皚皚

魚開切

遊蜂逐不去好鳥亦栖來前

有長流水下有小平臺時拂臺上石一舉風前杯花枝

陰我頭花蕊

如累切俗作蕊

落我懷獨酌復獨詠不覺月平

西巴俗不愛花竟春無人來唯此醉太守盡日不能迴
東坡春向暮樹木今何如漠漠花落盡翳翳葉生初每
日領童僕荷鋤仍決渠剗楚簡切土壅其本引泉溉其枯
小樹低數尺大樹長丈餘封植未幾時高下齊扶疎養
樹既如此養民亦何殊將欲茂枝葉必先救根株云何
救根株勸農均賦租云何茂枝葉省事寬刑書移此為
郡政庶幾忙俗蘇

登城東古臺

迢迢東郊上有土青雀鬼不知何代物疑是巴王臺巴
歌久無聲巴宮沒黃埃靡靡春草合牛羊緣四隈我來
一登眺目極心悠哉始見江山勢峰疊水環迴憑高視
聽曠向遠習襟開唯有故園念時時東北來

哭諸故人因寄元九

昨日哭寢門今日哭寢門借問所哭誰無非故交親偉
卿既長往質夫亦幽淪屈指數年世收涕自思身彼皆
少於我先為泉下人我今頭半白焉得身久存好懷元

郎中相識二十春昔見君生子今聞君抱孫存者盡老大逝者已成塵早晚升平宅開眉一見君

郡中春宴因贈諸客

僕本儒家子待詔金馬門忝塵親近地孤負聖明恩一旦奉優詔萬里牧遠人可憐島夷帥自稱為使君身騎牂牁馬口食塗江鱗闇淡緋衫故欄斑白髮新是時歲二月玉歷布春分頒條示皇澤命宴及良辰冉冉趨府吏蚩蚩聚州民有如蟄蟲鳥亦應天地春薰草席鋪坐

藤枝酒注樽中庭無平地高下隨所陳
蠻鼓聲坎坎巴女舞蹲蹲使君居上頭
掩口語衆賓勿笑風俗陋勿欺官府貧
蜂巢與蟻穴隨分有君臣

開元寺東池早春

池水暖溫暾

他昆切

水清波潏

力丹切

濫

以丹切

簇簇青泥中

新蒲葉如劍梅房小白裏柳彩輕黃
染順氣草薰薰適

情鷗汎汎舊遊成夢寐往事隨陽焱

以丹切

芳物感幽懷

一動平生念

東澗種柳

野性愛栽植，植柳水中坻。

陳知切

乘春持斧斫，栽截而樹。

之長短，既不一。高下隨所宜，倚岸埋大幹。臨流插小枝，
松柏不可待。梗楠固難移，不如種此樹。此樹易榮滋，無
根亦可活。成陰況非遲，三年未離郡。可以見依依，種罷
水邊憩。仰頭閒自思，富貴本非望。功名須待時，不種東
溪柳。端坐欲何為？

卧小齋

朝起視事畢晏坐飽食終散步長廊下卧退小齋中拙政自多暇幽情誰與同孰云二千石心如田野翁

步東坡

朝上東坡步夕上東坡步東坡何所愛愛此新成樹種植當歲初滋榮及春暮信意取次栽無行亦無數綠陰斜景轉芳氣微風度新葉鳥下來萎花蝶飛去閒携斑竹杖徐曳黃麻履欲識往來頻青苔成白路

徵秋稅畢題郡南亭

高城直下視蠢蠢見巴蠻安可施政教尚不通語言且
喜賦斂畢幸聞閭井安豈伊循良化賴此豐登年案牘
既簡少池館亦清閒秋雨簷果落夕鐘林鳥還南亭日
瀟灑偃卧恣踈頑

蚊蟆

巴徼炎毒早二月蚊蟆生啞

作答切

膚拂不去遶耳薨薨

聲斯物頗微細中人初甚輕如有膚受譖久則瘡痛

羽委

切成痛成無奈何所要防其萌麼蟲何足道潛諭傲人

情

登龍昌上寺望江南山懷錢舍人

騎馬出西郭悠悠欲何之獨上高寺去一與白雲期
虛檻晚瀟灑前山碧參差忽似青龍閣同望玉峰時
因詠松雪句永懷鸞鶴姿六年不相見況乃隔榮衰

昔嘗與錢舍人

登青龍寺上方同望藍田山各有絕句錢云偶來上寺因高望松雪分明見舊山

郊下

西日照高樹樹頭子規鳴東風吹野水水畔江蘼生
盡

日看山立有時尋澗行兀兀長如此何許似專城

遣懷

樂往必悲生泰來由否極誰言此數然吾道何終塞嘗
求簷尹卜拂龜竟默默亦曾仰問天天但蒼蒼色自茲
唯委命名利心雙息近日轉安閒鄉園亦休憶回看世
間苦苦在求不得我今無所求庶離憂悲域

歲晚

霜降水返壑風落木歸山冉冉歲將宴物皆復本源何

比南遷客五年獨未還命迭分已定日久心彌安亦嘗
心與口靜念私自言去國固非樂歸鄉未必歡何須自
生苦捨易求其難

負冬日

杲杲冬日出照我屋南隅負暄閉目坐和氣生肌膚初
似飲醇醪又如蟄者蘇外融百骸暢中適一念無曠然
忘所在心與虛空俱

委順

山城雖荒蕪竹樹有嘉色郡俸誠不多亦足充衣食外
累由心起心寧累自息尚欲忘家鄉誰能筭官職宜懷
齊遠近委順隨南北歸去誠可憐天涯住亦得

宿溪翁

時初除郎官赴朝

衆心愛金玉衆口貪酒肉何比溪上翁飲瓢亦自足溪
南刈薪草溪北修牆屋歲種一頃田春驅兩黃犢於中
甚安適此外無營欲溪畔偶相逢菴中遂同宿醉翁向
朝市問我何官祿虛言笑殺翁郎官應列宿

重過壽泉憶與楊九別時因題店壁

商州南十里有水名壽泉湧出石崖下流經山店前憶
昔相送日我去君言還寒波與老淚此地共潺湲一去
歷萬里再來經六年形容已變改處所猶依然他日君
過此慇懃吟此篇

西掖早秋直夜書意

自此後中書
舍人時作

涼風起禁掖新月生宮沼夜半秋闈來萬年枝嫋嫋炎
涼遞時節鐘鼓交昏曉遇聖惜年衰報恩愁力小素餐

無補益朱綬虛纏繞冠蓋栖野雲稻梁養山鳥量力私自省所得已非少五品不為賤五十不為夭若無知足心貪求何日了

庭松

堂下何所有十松當我階亂立無行次高下亦不齊高者三丈長下者十尺低有如野生物不知何人栽接以青瓦屋承之白沙臺朝昏有風月燥濕無塵泥疎韻秋

槭槭

止戟切
隕落貌

涼陰夏淒淒春深微雨夕滿葉珠蓑蓑

蘇回

切歲暮大雪天壓枝玉皚皚

魚開切

四時各有趣萬木非

其儕去年買此宅多為人所咤

呼來切

一家二十口移轉

就松來移來有何得但得煩襟開即此是益友豈必交

賢才顧我猶俗士冠蓋走塵埃未稱為松主時時一愧

懷

竹窓

常愛輞川寺竹窓東北廊一別十餘載見竹未曾忘今
春二月初卜居在新昌未暇作厩庫且先營一堂開窓

不糊紙種竹不依行意取北簷下窓與竹相當遠屋聲
浙浙逼人色蒼蒼煙通杳靄氣月透玲瓏光是時三伏
天天氣熱如湯獨此竹窓下朝迴解衣裳輕紗一幅巾
小簾六尺牀無客盡日靜有風終夜涼乃知前古人言
事頗諳詳清風北窓卧可以傲羲皇

同韓侍郎遊鄭家池吟詩小飲

野艇容三人晚池流浼浼

莫賄切

悠然依棹坐水思如江

海宿雨洗沙塵晴風蕩煙靄殘陽上竹樹枝葉生光彩

我本偶然來景物如相待白鷗驚不起綠茨行堪採齒
髮雖已衰性靈未云改逢時遇杯酒尚有心情在

晚歸有感

朝弔李家孤暮問崔家疾

時李十一侍御諸子尚居憂崔二十二員外三年卧病

回馬獨歸來低眉心鬱鬱平生所善者多不過六七如

何十年間零落三無一劉曾夢中見元向花前失

劉三十二

校書歿後嘗夢見之元八少尹今春櫻桃花時長逝漸老與誰遊春城好風日

曲江感秋二首

并序

元和二年三年四年予每歲有曲江感秋詩凡三篇編
在第七集卷是時予為左拾遺翰林學士無何貶江州
司馬忠州刺史前年遷主客郎中知制誥末周歲授中
書舍人今遊曲江又值秋日風物不改人事屢變況予
中否後遇昔壯今衰慨然感懷復有此作噫人生多故
不知明年秋又何許也時二年七月十日云耳

元和二年秋我年三十七長慶二年秋我年五十一中
間十四年六年居譴黜窮通與榮悴委運隨外物遂師

廬山遠重帛湘江屈夜聽竹枝愁秋看豔堆沒近辭巴
郡印又秉綸闈筆晚遇何足言白髮映朱紱消沈昔意
氣改換舊容質獨有曲江秋風煙如往日

疎蕪南岸草蕭颯西風樹秋到未幾時蟬聲又無數莎
平綠葦合蓮落青房露今日臨望時往年感秋處池中
水依舊城上山如故獨我髻間毛昔黑今垂素榮名與
壯齒相避如朝暮時命始欲來年顏已先去當春不歡
樂臨老徒驚悞故作詠懷詩題於曲江路

翫松竹二首

龍蛇隱大澤麋鹿遊豐草
栖鳳安於梧潛魚樂於藻
吾亦愛吾廬廬中樂吾道
前松後修竹偃卧可終老
各附其所安不知他物好

坐愛前檐前卧愛北窓北
窓竹多好風檐松有嘉色
幽懷一以合雜志隨緣息
在爾雖無情於予即有得
乃知性相近不必動與植

衰病無趣因吟所懷

朝餐多不飽夜卧常少睡自覺寢食間多無少年味平生好詩酒今亦將捨棄酒唯下藥飲無復曾歡醉詩多聽人吟自不題一字病姿與衰相日夜相繼至況當尚少朝彌慙居近侍終當求一郡聚少漁樵費合口便歸山不問人間事

逍遙詠

亦莫戀此身亦莫厭此身此身何足戀萬劫煩惱根此身何足厭一聚虛空塵無戀亦無厭始是逍遙人

白氏長慶集卷十一

欽定四庫全書

白氏長慶集卷十二

唐白居易撰

感傷四

歌行曲引雜體凡二十九首

短歌行

瞳瞳

徒紀切

太陽如火色上行千里下一刻出為白晝入

為夜圓轉如珠住不得住不得無奈何為君舉酒謔短
歌歌聲苦詞亦苦四座少年君聽取今夕未竟明夕催

秋風纔往春風回人無根蒂時不駐朱顏白日相隳頽
勸君且強笑一面勸君且強飲一杯人生不得長歡樂
年少須臾老到來

生離別

食糜不易食梅難糜能苦兮梅能酸未如生別之為難
苦在心兮酸在肝晨鷄再鳴殘月沒征馬連嘶行人出
回看骨肉哭一聲梅酸糜苦甘如蜜黃河水白黃雲秋
行人河邊相對愁天寒野曠何處宿棠梨葉戰風颭颭

疏鳩切

生離別生離別憂從中來無斷絕憂極心勞血氣

衰末年三十生白髮

浩詞行

天長地久無終畢昨夜今朝又明日鬢髮蒼浪牙齒疎
不覺身年四十七前去五十有幾年把鏡照面心茫然
既無長繩繫白日又無大藥駐朱顏朱顏日漸不如故
青史功名在何處欲留年少待富貴富貴不來年少去
去復去兮如長河東流赴海無迴波賢愚貴賤同歸盡

北邙塚墓高嵯峨古來如此非獨我未死有酒且高歌
顏回短命伯夷餓我今所得亦已多功名富貴須待命
命若不來知奈何

王夫子

王夫子送君為一尉東南三千五百里道途雖遠位雖
卑月俸猶堪活妻子男兒口讀古人書束帶斂手來從
事近將狗祿給一家遠則行道佐時理行道佐時須待
命委身下位無為恥命苟未來且求食官無卑高及遠

通男兒上既未能濟天下又不至饑寒死吾觀九品
至一品其間氣味都相似紫綬朱紱青布衫顏色不同
而已矣王夫子別有一事欲勸君逢酒逢春且歡喜

江南遇天寶樂叟

白頭老叟泣且言祿山未亂入梨園能彈琵琶和法曲
多在華清隨至尊是時天下太平久年年十月坐朝元
千官起居環珮合萬國會同車馬奔金殿照耀石甕寺
蘭麝熏煑溫湯源貴妃宛轉侍君側體弱不勝珠翠繁

冬雪飄緇錦袍暖春風蕩漾霓裳翻歡娛未足燕冠至
弓勁馬肥胡語喧幽土人遷避夷狄鼎湖龍去哭軒轅
從此漂淪到南土萬人死盡一身存秋風江上浪無限
暮雨舟中酒一樽涸魚久失風波勢枯草曾沾雨露恩
我自秦來君莫問驪山渭水如荒村新豐樹老籠明月
長生殿閣鎖春雲紅葉紛紛葢敔瓦綠苔重重封壞垣
唯有中官作宮使每年寒食一開門

送張山人歸嵩陽

黃昏慘慘天微雪
修行坊西鼓聲絕
張生馬瘦衣且單
夜扣柴門與我別
媿君冒寒來別我
為君沽酒張燈火
酒酣火煖與君言
何事出關又入關
荅云前年偶下山
四十餘月客長安
長安古來名利地
空手無金行路難
朝遊九城陌
肥馬輕車欺殺客
暮宿五侯門
殘茶冷酒愁殺人
春明門前便是嵩
山路幸有雲泉容
此身明日辭君且
歸去

醉後走筆酬劉五主簿長句之贈兼簡張大賈

二十四先輩昆季

劉兄文高行孤立十五年前名翕習是時相遇在符離
我年二十君三十得意忘年心迹親寓居同縣日知聞
衡門寂寞朝尋我古寺蕭條暮訪君朝來暮去多攜手
窮巷貧居何所有秋燈夜寫聯句詩春雪朝傾煖寒酒
埤蒲康切湖綠愛白鷗飛灘蘇回切水清憐紅鯉肥偶語閒
攀芳樹立相扶醉蹋落花歸張賈弟兄同里巷乘閒數
數來相訪雨天連宿草堂中月夜徐行草橋上我年漸長

忽自驚鏡中冉冉髭鬚生心畏後時同勵志身牽前事

各求名問我棲棲何所適鄉人薦為鹿鳴客二千里外

謝交遊三十韻詩慰行役出門可憐唯一身弊裘瘦馬

入咸秦鏐鏐街鼓紅塵闇晚到長安無主人二賈二張

與余弟驅車遷

良以迤切延知

來相繼操詞握賦為干戈

鋒銳森然勝氣多同入文場多苦戰五人十載九登科

二張得雋名居甲美退爭雄重告捷棠棣輝榮並桂枝

芝蘭芬馥和荆葉唯有沅犀屈未伸握中自謂駭雞珍

三年不鳴鳴必大豈獨駭難當駭人元和運氣千年聖
同遇明時余最幸始辭秘閣吏王畿遽列諫垣升禁闥
蹇步何堪鳴珮玉衰容不稱著朝衣閭闔晨開朝百辟
冕旒不動香煙碧步登龍尾上虛空立去天顏無咫尺
宮花似雪從乘輿禁月如霜坐直廬身賤每驚隨內宴
才微常愧草天書晚松寒竹新昌第職居密近門多閉
日暮銀臺下直回故人到門門暫開回頭下馬一相顧
塵土滿衣何處來斂手炎涼敘未畢先說舊山今悔出

岐陽旅宦少歡娛江左遷遊費時日贈我一篇行路吟
吟之句句披沙金歲月徒催白髮貌泥塗不屈青雲心
誰謂茫茫天地意短才獲用長才棄我隨鷓鴣入煙雲
謬上丹墀為近臣君同鸞鳳棲荆棘猶著青袍作選人
惆悵知賢不能薦徒為出入蓬萊殿月慙諫紙二百張
歲愧俸錢三十萬大底浮榮何足道幾度相逢即身老
且傾斗酒慰羈愁重話符離問舊遊北巷鄰居幾家去
東林舊院何人住武里村花落復開流溝山色應如故

感此酬君千字詩
醉中分手又何之
須知通塞尋常事
莫歎浮沈先後時
慷慨臨歧重相勉
殷勤別後加飡飯
君不見買臣衣錦還故鄉
五十身榮未為晚

和錢員外荅盧員外早春獨遊曲江見寄長句

春來有色闇融融
先到詩情酒思中
柳岸霏微裊

乙葉切

塵雨杏園淡蕩開
花風聞君獨遊心
鬱鬱薄晚新晴騎
馬出醉思詩侶有
同年春歎翰林無
暇日雲夫首倡寒
玉音蔚章繼和春
搜吟此時我亦閉
門坐一日風光三

處心

雲夫蔚章同年及第時
予與蔚章同在翰林

東墟晚歇

時退居渭村

涼風冷露蕭索天
黃蒿紫菊荒涼田
遠塚秋花少顏色
細蟲小蝶飛翻翻
中有騰騰獨行者
手拄漁竿不騎馬
晚從南澗釣魚回
歇此墟中白楊下
褐衣半故白髮新
人逢知我是何人
誰言渭浦棲遲客
曾作甘泉侍從臣

客中月

客從江南來來時
月上弦悠悠行旅
中三見清光圓曉

隨殘月行夕與新月宿誰謂月無情千里遠相逐朝發
渭水橋暮入長安陌不知今夜月又作誰家客

挽歌詞

丹旄何飛揚素轡亦悲鳴晨光照閭巷輶音而車儼欲行
蕭條九月天哀挽出重城借問送者誰妻子與弟兄蒼
蒼上古原峨峨開新塋含酸一慟哭異口同哀聲舊壠
轉蕪絕新墳日羅列春風草綠北邙山此地年年生死
別

長相思

九月西風興月冷霜華凝思君秋夜長一夜魂九升二
月東風來草折花心開思君春日遲一日腸九迴妾住
洛橋北君住洛橋南十五即相識今年二十三有如女
蘿草生在松之側蔓短枝苦高縈迴上不得人言人有
願願至天必成願作遠方獸步步比肩行願作深山木
枝枝連理生

山鷓鴣

山鷓鴣朝朝暮暮啼復啼時露白風淒淒黃茅崗頭
秋日晚苦竹嶺下寒月低畬田有粟何不啄石楠有枝
何不棲迢迢不緩復不急樓上舟中聲閣入夢鄉遷客
展轉卧抱兒寡婦彷徨立山鷓鴣爾本此鄉鳥生不辭
巢不別羣何苦聲聲啼到曉啼到曉唯能愁北人南人
慣聞如不聞

放旅鴈

元和十年冬作

九江十年冬大雪江水生冰樹枝折百鳥無食東西飛

中有旅鴈聲最飢雪中啄草冰上宿翅冷騰空飛動遲
江童持網捕將去手携入市生賣之我本北人今譴謫
人鳥雖殊同是客見此客鳥傷客人贖汝放汝飛入雲
鴈鴈汝飛向何處第一莫飛西北去淮西有賊討未平
百萬甲兵久屯聚官軍賊軍相守老食盡兵窮將及汝
健兒飢餓射汝喫拔汝翅翎為箭羽

送春歸

元和十一年三月三十日作

送春歸三月盡日日暮時去年杏園花飛御溝綠何處

送春曲江曲今年杜鵑花落子規啼送春何處西江西
帝城送春猶快快天涯送春能不加惆悵莫惆悵送春
人冗員無替五年罷應須準擬再送潯陽春五年炎涼
凡十變安知此身健不健好送今年江上春明年未死
還相見

山石榴寄元九

山石榴一名山躑躅一名杜鵑花杜鵑啼時花撲撲九
江三月杜鵑來一聲催得一枝開江城上佐閒無事山

下斷

之六切

得廳前栽爛漫一欄十八樹根株有數花無

數千房萬葉一時新嫩紫殷紅鮮麴塵淚痕裛

乙業切損

臙脂臉剪刀裁破紅綃巾謫仙初墮愁在世姍

齒下切少女也

女新嫁嬌泥

去聲

春日射血珠將滴地風翻焰火欲燒人

閒折兩枝持在手細看不似人間有花中此物是西施

芙蓉芍藥皆嫫母奇芳絕豔別者誰通州遷客元拾遺

拾遺初貶江陵去去時正值青春暮商山秦嶺愁殺人

山石榴花紅夾路題詩報我何所云若云色似石榴裙

當時叢畔唯思我今日欄前只憶君
憶君不見坐銷落日西風起紅紛紛

畫竹歌

并序

協律郎蕭悅善畫竹舉時無倫蕭亦甚自秘重有終歲
求其一竿一枝而不得者知予天與好事忽寫一十五
竿惠然見投予厚其意高其藝無以答貺作歌以報之
凡一百八十六字云

植物之中竹難寫古今雖畫無似者蕭郎下筆獨逼真

丹青以來唯一人
人畫竹身肥擁腫蕭畫莖瘦節節竦

人畫竹梢死羸垂蕭畫枝活葉葉動不根而生從意生

不笋而成由筆成野塘水邊碕

渠宜切

岸側森森兩叢

十五莖嬋娟不失筠粉態蕭颯盡得風煙情舉頭忽看

不似畫低耳靜聽疑有聲西叢七莖勁而健省向天竺

寺前石上見東叢八莖疎且寒曾憶湘妃廟裏雨中看

幽姿遠思少人別與君相顧空長歎蕭郎蕭郎老可惜

手顫

六善切

眼昏頭雪色自言便是絕筆時從今此竹猶

難得

真娘墓

墓在虎丘寺

真娘墓虎丘道不識真娘鏡中面
唯見真娘墓頭草霜摧桃李風折蓮
真娘死時猶少年脂膚莫手不牢固
世間有物難留連易銷歇塞北花江南雪

長恨歌

漢王重色思傾國御宇多年求不得
楊家有女初長成養在深閨人未識
天生麗質難自棄一朝選在君王側

回頭一笑百媚生六宮粉黛無顏色春寒賜浴華清池
溫泉水滑洗凝脂侍兒扶起嬌無力始是新承恩澤時
雲鬢花顏金步搖芙蓉帳暖度春宵春宵苦短日高起
從此君王不早朝承歡侍宴無閒暇春從春遊夜專夜
後宮佳麗三千人三千寵愛在一身金屋粧成嬌侍夜
玉樓宴罷醉和春姊妹弟兄皆列土可憐光彩生門戶
遂令天下父母心不重生男重生女驪宮高處入青雲
仙樂風飄處處聞緩歌謾舞凝絲竹盡日君王看不足

漁陽鞞鼓動地來驚破霓裳羽衣曲九重城闕煙塵生
千乘萬騎西南行翠華搖搖行復止西出都門百餘里
六軍不發無奈何宛轉蛾眉馬前死花鈿委地無人收
翠翹金雀玉搔頭君王掩面救不得回首血淚相和流
黃埃散漫風蕭索雲棧縈紆登劍閣峨嵋山下少人行
旌旗無光日色薄蜀江水碧蜀山青聖主朝朝暮暮情
行宮見月傷心色夜雨聞鈴腸斷聲天旋地轉迴龍馭
到此躊躇不能去馬嵬坡下泥土中不見玉顏空死處

君臣相顧盡沾衣東望都門信馬歸歸來池苑皆依舊
太液芙蓉未央柳芙蓉如面柳如眉對此如何不淚垂
春風桃李花開夜秋雨梧桐葉落時西宮南苑多秋草
宮葉滿堦紅不掃梨園弟子白髮新椒房阿監青娥老
夕殿螢飛思悄然孤燈挑盡未成眠遲遲鐘鼓初長夜
耿耿星河欲曙天鴛鴦瓦冷霜華重翡翠衾寒誰與共
悠悠生死別經年冤冤不曾來入夢臨邛道士鴻都客
能以精誠致冤冤為感君王展轉思遂教方士慇懃覓

排空馭氣奔如電升天入地求之遍上窮碧落下黃泉
兩處茫茫皆不見忽聞海上有仙山山在虛無縹緲間
樓閣玲瓏五雲起其中綽約多仙子中有一人字太真
雪膚花貌參差是金闕西廂叩玉扃轉教小玉報雙成
聞道漢家天子使九華帳裡夢魂驚攬衣推枕起徘徊
珠箔銀屏邈迤開雲鬢半偏新睡覺花冠不整下堂來
風吹仙袂飄飄舉猶似霓裳羽衣舞玉容寂寞淚闌干
梨花一枝春帶雨含情凝涕謝君王一別音容兩渺茫

昭陽殿裡恩愛絕
蓬萊宮中日月長
回頭下望人寰處
不見長安見塵霧
唯將舊物表深情
鈿合金釵寄將去
釵留一股合一扇
釵擘黃金合分鈿
但令心似金鈿堅
天上人間會相見
臨別殷勤重寄詞
詞中有誓兩心知
七月七日長生殿
夜半無人私語時
在天願作比翼鳥
在地願為連理枝
天長地久有時盡
此恨綿綿無絕期

附長恨歌傳

前進士陳鴻撰

開元中泰階平四海無事玄宗在位歲久倦于旰食

宵衣旰食無小大始委于右丞相深居遊宴以聲色自
娛先是元獻皇后武淑妃皆有寵相次即世宮中雖
良家子千數無可悅目者上心忽忽不樂時每歲十
月駕幸華清宮內外命婦熠燿景從浴日餘波賜以
湯沐春風靈液淡蕩其間上心油然若有顧遇左右
前後粉色如土詔高力士潛搜外宮得宏農楊玄琰
女于壽邸既笄矣止忍切髮膩理纖穠中度舉止閑
冶如漢武帝李夫人別疏湯泉詔賜澡瑩既出水體

弱力微若不任羅綺光彩煥發轉動照人上甚悅進
見之日奏霓裳羽衣曲以導之定情之日授金釵鈿
合以固之又命戴步搖垂金釤明年冊為貴妃半后
服用繇是治其容敏其詞婉嬾萬態以中上意上益
嬖焉時省風九州泥金五嶽驪山雪夜上陽春朝與
上行同室宴專席寢專房雖有三夫人九嬪二十七
世婦八十一御妻暨後宮才人樂府妓女使天子無
顧盼意自是六宮無復進幸者非徒殊豔尤態致是

蓋才智明慧善巧便佞先意希旨有不可形容者叔父昆弟皆列在清貴爵為通侯姊妹封國夫人富埒王室車服邸第與大長公主侔而恩澤勢力則又過之出入禁門不問京師長吏為側目故當時謠詠有云生女勿悲酸生男勿喜歡又曰男不封侯女作妃看女却為門上楣其人心羨慕如此天寶末兄國忠盜丞相位愚弄國柄及安祿山引兵向闕以討楊氏為辭潼關不守翠華南幸出咸陽道次馬嵬亭六軍

徘徊持戟不進從官郎吏伏上馬前請誅錯以謝天
下國忠奉釐纓盤水死於道周左右之意未快上問
之當時敢言者請以貴妃塞天下怒上知不免而不
忍見其死反袂掩面使牽之而去蒼黃展轉竟就絕
於尺組之下既而玄宗狩成都肅宗受禪靈武明年
大兇歸元大駕還都尊玄宗為太上皇就養南宮遷
于西內時移事去樂盡悲來每至春之日冬之夜池
蓮夏開宮槐秋落梨園弟子玉管發音聞霓裳羽衣

一聲則天顏不怡左右獻歎三載一意其念不衰求之夢寃杳不能得適有道士自蜀來知上意心念楊妃如自言有李少君之術玄宗大喜命致其神方士乃竭其術以索之不至又能遊神馭氣出天界沒地府以求之不見又旁求四虛上下東極大海跨蓬壺見最高仙山上多樓闕西廂下有洞戶東向闔其門署曰玉妃太真院方士抽簪扣扉有雙童女出應問方士造次未及言而雙鬟復入俄有碧衣侍女又

至詰其所從方士因稱唐天子使者且致其命碧衣
云玉妃方寢請少待之于時雲海沈沈洞天日曉瓊
戶重闔悄然無聲方士屏息斂足拱手門下久之而
碧衣延入且曰玉妃出見一人冠金蓮披紫綃珮紅
玉曳鳳舄左右侍者七八人揖方士問皇帝安否次
問天寶十四年已還事言訖憫然指碧衣取金釵鈿
合各析其半授使者曰為謝太上皇謹獻是物尋舊
好也方士受辭與信將行色有不足玉妃固徵其意

復前跪致詞請當時一事不為他人聞者驗於太上
皇不然恐鈿合金釵負新垣平之詐也玉妃茫然退
立若有所思徐而言之曰昔天寶十載侍駕避暑驪
山宮秋七月牽牛織女相見之夕秦人風俗是夜張
錦綉陳飲食瓜果焚香於庭號為乞巧宮掖間猶尚
之夜殆半休侍衛於東西廂獨侍上上凭肩而立因
仰天感牛女事密相誓心願世世為夫婦言畢執手
各鳴咽此獨君王知之耳因自悲曰由此一念又不

得居此復墮下界且結後緣或為天或為人決再相
見好合如舊因言太上皇亦不久人世幸唯自安無
自苦耳使者還奏太上皇皇心震悼日日不豫其年
夏四月南宮宴駕元和元年冬十二月太原白樂天
自校書郎尉于鹽屋鴻與瑯琊王質夫家于是邑暇
日相携遊仙遊寺話及此事相與感歎質夫舉酒于
樂天前曰夫希代之事非遇出世之才潤色之則與
時消沒不聞于世樂天深於詩多於情者也試為歌

之如何樂天因為長恨歌意者不但感其事亦欲懲
尤物室亂階垂于將來也歌既成使鴻傳焉世所不
聞者予非開元遺民不得知世所知者有玄宗本紀
在今但傳長恨歌云爾

婦人苦

蟬髻加意梳蛾眉用心掃幾度曉粧成君看不言好妾
身重同穴君意輕偕老惆悵去年來心知未能道今朝
一開口語少意何深願引他時事移君此日心人言夫

婦親義合如一身及至死生際何曾苦樂均婦人一喪
夫終身守孤子有如林中竹忽被風吹折一折不重生
枯死猶抱節男兒若喪婦能不暫傷情應似門前柳逢
春易發榮風吹一枝折還有一枝生為君委曲言願君
再三聽須知婦人苦從此莫相輕

長安道

花枝缺處青樓開豔歌一曲酒一盃美人勸我急行樂
自古朱顏不再來君不見外州官客長安道一迴來時

一迴老

潛別離

不得哭潛別離不得語闇相思兩心之外無人知深籠
夜鎖獨樓烏利劍春斷連理枝河水雖濁有清日烏頭
雖黑有白時唯有潛離與闇別彼此甘心無後期

隔浦蓮

隔浦愛紅蓮昨日看猶在夜來風吹落只得一回採花
開雖有明年期復愁明年還暫時

寒食野望吟

丘墟郭門外寒食誰家哭風吹曠野紙錢飛古墓累累
春草綠棠梨花映白楊樹盡是死生離別處冥漠重泉
哭不聞蕭蕭暮雨人歸去

琵琶引 并序

元和十年予左遷九江郡司馬明年秋送客湓浦口聞
舟中夜彈琵琶者聽其音錚錚然有京都聲問其人本
長安倡女嘗學琵琶於穆曹二善才年長色衰委身為

賈人婦遂命酒使快彈數曲曲罷憫然自敘少小時歡樂事今漂淪憔悴轉徙於江湖間予出官二年恬然自安感斯人言是夕始覺有遷謫意因為長句歌以贈之
凡六百一十二言命曰琵琶行

潯陽江頭夜送客楓葉荻花秋瑟瑟

半紅半白之貌

主人下馬

客在船舉酒欲飲無管絃醉不成歡慘將別別時茫茫江浸月忽聞水上琵琶聲主人忘歸客不發尋聲闇問彈者誰琵琶聲停欲語遲移船相近邀相見添酒回燈

重開宴千呼萬喚始出來猶抱琵琶半遮面轉軸撥絃

三兩聲未成曲調先有情絃絃掩抑聲聲思似訴平生

不得志低眉信手續續彈說盡心中無限事輕攏

盧容切

慢撚

乃珍切

抹復挑初為霓裳後六么大絃嘈嘈如急雨

小絃切切如私語嘈嘈切切錯雜彈大珠小珠落玉盤

間關鶯語花底滑幽咽泉流水下灘水泉冷澁絃凝絕

凝絕不通聲暫歇別有幽愁闇恨生此時無聲勝有聲

銀鈿乍破水漿迸鐵騎突出刀鎗鳴曲終收撥當心畫

四絃一聲如裂帛東船西舫悄無言唯見江心秋月白
沈吟放撥插絃中整頓衣裳起斂容自言本是京城女
家在蝦蟇陵下住十三學得琵琶成名屬教坊第一部
曲罷長教善才服粧成每被秋娘妬五陵年少爭纏頭
一曲紅綃不知數鈿頭銀篦擊節碎血色羅裙翻酒汙
今年歡笑復明年秋月春風等閒度弟走從軍阿姨死
暮去朝來顏色故門前冷落鞍馬稀老大嫁作商人婦
商人重利輕別離前月浮梁買茶去去來江口守空船

遶船明月江水寒夜深忽夢少年事夢啼粧淚紅闌干
我聞琵琶已歎息又聞此語重唧唧同是天涯淪落人
相逢何必曾相識我從去年辭帝京謫居卧病潯陽城
潯陽地僻無音樂終歲不聞絲竹聲住近湓江地低濕
黃蘆苦竹遶宅生其間旦暮聞何物杜鵑啼血猿哀鳴
春江花朝秋月夜往往取酒還獨傾豈無山歌與村笛
嘔啞嘲哢難為聽今夜聞君琵琶語如聽仙樂耳暫明
莫辭更坐彈一曲為君翻作琵琶行感我此言良久立

却坐促絃絃轉急淒淒不似向前聲滿座重聞皆掩泣
座中泣下誰最多江州司馬青衫濕

簡簡吟

蘇家小女名簡簡芙蓉花腮柳葉眼十一把鏡學點粧
十二抽針能綉裳十三行坐事調品不肯迷頭白地藏
玲瓏雲髻生花樣飄飄風袖薔薇香殊姿異態不可狀
忽忽轉動如有光二月繁霜殺桃李明年欲嫁今年死
丈人阿母勿悲啼此女不是凡夫妻恐是天仙謫人世

只合人間十三歲大都好物不堅牢綵雲易散琉璃脆
花非花

花非花霧非霧夜半來天明去來時春夢幾多時去似
朝雲無覓處

醉後狂言酬贈蕭殷二協律

餘杭邑客多羈貧其間甚者蕭與殷天寒身上猶衣葛
日高甌中未拂塵江城山寺十一月北風吹沙雪紛紛
賓客不見綈袍惠黎庶未沾襦袴恩此時太守自慙愧


重衣複衾有餘溫因命染人與針女先製兩裘贈二君
吳綿細軟桂布密柔如狐腋白似雲勞將詩書投贈我
如此小惠何足論我有大裘君未見寬廣和暖如陽春
此裘非繒亦非繡裁以法度絮似仁刀尺鈍拙製未畢
出亦不獨裹一身若令在郡得五考與君展覆杭州人

醉歌

示妓人商玲瓏

罷胡琴掩秦瑟玲瓏再拜歌初畢誰道使君不解歌聽
唱黃雞與白日黃雞催曉丑時鳴白日催年酉時沒腰

問紅綬繫未穩鏡裏朱顏看已失玲瓏玲瓏奈老何使
君歌了汝更歌



白氏長慶集卷十二